

四庫全書

集部

欽定四庫全書

集部

御定歷代賦彙外集卷九

詳校官檢討_臣劉所

主事銜_臣徐以坤覆勘

總校官編修_臣王燕緒

校對官中書_臣陸湘

謄錄監生_臣馮光熙

欽定四庫全書

御定歷代賦彙外集卷九

行旅

北征賦

漢班彪

余遭世之顛覆兮，罹填塞之阨災。
舊室滅以丘墟兮，曾不得乎少留。
遂奮袂以北征兮，超絕迹而遠遊。
朝發軔於長都兮，夕宿瓠谷之玄宮。
歷雲門而反顧望通天之崇崇。
乘陵岡以登降兮，息邠邠之邑鄉。
慕公劉之遺德及

行葦之不傷彼何生之優渥我獨罹此百殃故時會之
變化兮非天命之靡常登赤須之長坂入義渠之舊城
忿戎王之淫狡穢宣后之失貞嘉秦昭之討賊赫斯怒
以北征紛吾去此舊都兮駢遲遲以歷茲遂舒節以遠
逝指安定以為期涉長路之繇繇兮遠紆迴以膠流過
泥陽而太息悲祖廟之不修釋余馬於彭陽兮且弭節
而自思日晡晡其將暮兮覩牛羊之下來寤怨曠之傷
情兮哀詩人之歎時越安定以容與兮遵長城之漫漫

劇蒙公之疲民兮為彊秦乎築怨舍高亥之切憂兮事
蠻狄之遼患不耀德以綏遠兮顧厚固而繕藩首身分
而不寤兮猶數功而辭譽何夫子之妄說兮孰云地脈
而生殘登障隧而遙望兮聊須臾以婆娑閔獯鬻之猾
夏兮弔尉佗於朝那從聖文之克讓兮不勞師而幣加
惠父兄於南越兮黜帝號於尉陀降几杖於藩國兮折
吳淠之逆邪惟太宗之蕩蕩兮豈曩秦之所圖齊高平
而周覽兮望山谷之嵯峨野蕭條以莽蕩迴千里而無

家風焱發以飄飄兮谷水灌以揚波飛雲霧之杳杳涉
積雪之皚皚鴈邕邕以羣翔兮鷗鷄鳴以濟濟遊子悲
其故鄉兮心愴恨以傷懷撫長劒而慨息兮泣漣落而
霑衣攬余涕以於邑兮哀生民之多故夫何陰曠之不
陽兮嗟久失其平度諒時運之所為兮永伊鬱其誰愬
亂曰夫子固窮遊藝文兮樂以忘憂惟聖賢兮達人從
事有儀則兮行止屈申與時息兮君子履信無不居兮
雖之蠻貊何憂懼兮

東征賦

漢曹大家

惟永初之有七兮余隨子兮東征時孟春之吉日兮撰
良辰而將行乃舉趾而升輿兮夕余宿乎偃師遂去故
而就新兮志愴恨而懷悲明發曙而不寐兮心遲遲而
有違酌樽酒以弛念兮喟抑情而自非諒不登巢而琢
蠡兮得不陳力而相追且從衆而就列兮聽天命之所
歸遵通衢之大道兮求捷徑欲從誰乃遂往而徂逝兮
聊遊目而遨魂歷七邑而觀覽兮遭鞏縣之多艱望河

洛之交流兮看成皋之旋門既免脫於峻嶮兮歷滎陽
而過武卷食原武以息足宿陽武之桑間涉封丘而踐
路慕京師而竊歎小人性之懷土兮自書傳而有焉遂
進道而少前兮得平丘之北邊入匡郭而追遠兮念夫
子之厄勤彼哀亂之無道兮乃困畏乎聖人悵容與而
久駐兮忘日夕而將昏到長垣之境界察農野之居民
睹蒲城之丘墟兮生荊棘之榛榛惕覺悟而顧問兮想
子路之威神衛人嘉其勇義兮迄於今而稱云蘧氏在

城之東南兮民亦尚其丘墳唯令德為不朽兮身既歿
而名存惟經典之所美兮貴道德與仁賢吳札稱多君
子兮其言信而有徵後哀微而遭患兮遂陵遲而不興
知性命之在天由力行而近仁勉仰高而蹈景盡忠恕
而與人好正直而不回兮精誠通於明神庶靈祇之鑒
照兮祐貞良而輔信亂曰君子之思必成文兮盍各言
志慕古人兮先君行止則有作兮雖其不敏敢不法兮
貴賤貧富不可求兮正身履道以俟時兮修短之運愚

智同兮靖恭委命唯吉凶兮敬慎無怠思謙約兮清靜
少欲師公綽兮

東征賦

晉
袁宏

惟吾生於末運託一葉於鄧林顧微軀之眇眇若絕響
之遺音壯公瑾之明達吐不世之奇策挫百勝於崇朝
靡雲旗於赤壁三光一舉而參分四海指麾而中隔過
武昌以逍遙登樊山以流眄訪遺老以證往乃西鄂之
舊縣曩有吳之初基升員丘而豹變爾乃出桑洛會通

川背彭澤面長泉洲渚迢遞巖岫虛懸即雲似嶺望水
若天日月出乎波中雲霓生於浪間嗟我行之彌留跨
晦朔之倏忽風塞林而蕭瑟雲出山而蓬勃向孫氏之
南面鑽靈龜以相土模鄴鎬之制度寫河洛之規矩經
始郭郭築室葺宇金城萬雉崇墉百堵君臣有章上下
獲敘所以能三分天下而有其文武到吳都以停舟覽
闔閭之餘塵建修城以營郭引通流而發津遠矣吳德
舊邦維新太伯被髮仲雍文身言偃以文學遺風季札

以讓國稱仁高節顯於華夏端委行乎海濱

東征賦

唐高適

歲在甲申秋窮季月高子遊梁復久方適楚以超忽望
君門之悠哉微先容以効拙始不隱而不仕宜漂淪而
播越出東苑而遂行汭濁河而茲始感隋皇之敗德劃
平原而為此西馳洛汭東並淮涘地豁山開川流波委
六宮景從千官邈迤龍舟錦帆照耀乎數千里大駕將
去羣盜日起尸位者卷舌而偷生直諫者解頤而後死

寄腹心於梟獍任手足於蛇虺終受殺於匹夫尚興疑
於愛子豈不為窮力役於征戰務淫逸於奢侈六軍悲
牧野之師萬姓哭遼陽之鬼嗟顛覆於瞬目指年代於
流水唯見長亭之煙火悲曠野之荆杞至鄴縣之舊邑
懷蕭相之高風既屈節於主吏每歸誠於沛公始俱起
於天下乃從定於關中推金帛於他人抱圖籍於我躬
按山川之險阻救天地於屯蒙嘉盈俸以增邑方指蹤
而建功納邵平以防患舉曹參而告終經絰城而永望

想譙郡而銷憂慨魏武之雄圖終大濟以橫流用兵戈
以威四海挾天子而令諸侯乃擅命以誅伏徒矯跡以
安劉吾始未知夫逆順胡寧比於殷周下符離之西偏
臨彭城之高岸連山鬱而潏蕩分大澤乎渺漫憶昔天
未厭禍項氏叛換解齊歸楚自蕭擊漢天地無色風塵
潰亂憫君王之坎軻混士卒以奔散苟炎運之克昌豈
人生之塗炭次靈璧之逆旅面垓下之遺墟嗟魯公之
慷慨聞楚聲之悵於歌拔山之涕洟竊霸圖而莫居捐

亞父之何甚悲虞姬之有餘出重圍而狼狽至陰陵以
躊躇顧天亡以自負雖身死今焉如登夏丘而寓目對
蒲隧而愁予聞取慮之斯在徵長直而舍諸宿徐縣之
迴津惟偃王之舊域方以小而事大豈無位而有德彼
皆昏暴以喪邦伊何仁義而亡國高延陵之挂劍慕班
彪之迷職涵沛水之悠悠俯婁林之行直即日河許依
然泗上山川土田耳目清曠眺睢源之呀豁倚楚關之
雄壯挂輕席於中流順長風以破浪過盱眙之邑屋傷

義帝之波蕩雖三戶之亡秦知萬人以離項越龜山而
訪泊入漁浦而待潮鴻鴈飛兮木葉下楚歌悲兮雨瀟
瀟霜封野樹冰凍寒苗岸草無色蘆花自飄幸息肩於
人事願投跡於漁樵思魏闕而天遠向秦川而路遙候
鳴鷄以進帆趨亂流以爭迅縱孤舟於浩大撫垂堂以
誠慎遵往主於淮陰徵昔賢於韓信哀王孫以寄食嘉
漂母之無愠鄙亭長之不仁乃晨炊而嗇怯忽從龍以
獲騁遂擒豹以自奮破全趙而用奇稱假齊以益振幸

辭通以感惠俄結締而謀釁當處約而心亨曷持盈而不順陵赤岸之迢遞棹白波之紆餘歷山陽之村野投襄賁之邑居人多耆艾俗喜觀魚連葭葦於郊甸雜汀洲於里閭感百川之朝宗彌結念於歸歟日杲杲以麗天雲飄飄以卷舒魯放情而蹈海丘永歎於乘桴遇坎則止吾令不知其所如哉

西征賦

晉
潘岳

歲次玄枵月旅蕤賓丙丁統日乙未御辰潘子憑軾西

征自京徂秦迺喟然而歎曰古往今來邈矣悠哉寥廓
忽恍化一氣而甄三才此三才者天地人道唯生與位
謂之大寶生有修短之命位有通塞之遇鬼神莫之要
聖智弗能豫當休明之盛世今託菲薄之陋質納旌弓
於鉉台讚庶績於帝室嗟鄙夫之常累固既得而患失
無柳季之直道佐士師而一黜武皇忽其升遐八音遏
於四海天子寢於諒闇兮百官聽於冢宰彼負荷之殊
重兮雖伊周其猶殆窺七貴於漢庭疇一姓之或在無

危明以安位祗居逼以示專陷亂逆以受戮匪降禍之
自天孔隨時以行藏遽與國而舒卷苟蔽微以繆章患
過辟之未遠悟山潛之逸士卓長往而不反陋吾人之
拘攣飄萍浮而蓬轉寮位偶其隆替名節准以隳落危
素卵之累殼甚玄燕之巢幕心戰懼以兢悚如臨深而
履薄夕獲歸於都外宵未中而難作匪擇木以棲集藪
林焚而鳥存遭千載之嘉會皇合德於乾坤弛秋霜之
嚴威流春澤之渥恩甄大義以明責反初服於私門皇

鑒揆余之忠誠俄命余以末班牧疲人於西夏攜老幼而入關丘去魯而顧歎季過沛而涕零伊故鄉之可懷
疾聖達之幽情矧匹夫之安土邈投身於鎬京猶犬馬
之戀主竊託慕於關庭眷輦洛而掩涕思纏繇於墳塋
爾乃越平樂過街郵秣馬皋門稅駕西周遠矣姬德興
自高辛思文后稷厥初生民率西水滸化流岐幽祚隆
昌發舊邦惟新旋牧野而歷茲愈守柔以執競夜申旦
而不寐憂天保之未定惟泰山其猶危祀八百而餘慶

鑒亡王之驕淫竄南巢以投命坐積薪以待然方指日
而比盛人度量之乖舛何相越之遼迴考土中於斯邑
成建都而營築既定鼎於郊鄔遂鑽龜而啓繇平失道
而來遷繫二國而是祐豈時王之無僻賴先哲以長懋
望圉北之兩門感號鄭之納惠討子頽之樂禍尤闕西
之效戾重戮帶以定襄弘大順以霸世靈壅川以止鬪
晉演義以獻說咨景悼以迄丐政凌遲而彌季俾庶朝
之構逆立兩王而干位踰十葉以逮赧邦分崩而為二

竟橫噬於虎口輸文武之神器澡孝水而濯纓嘉善名
而在茲天赤子於新安坎路側而瘞之亭有千秋之號
子無七旬之期雖勉勵於延吳實潛慟乎余慈眄山川
以懷古悵攬轡於中塗虐項氏之肆暴坑降卒之無辜
激秦人以歸德成劉后之來蘇事洄洑而好還卒宗滅
而身屠經澠池而長想停余車而不進秦虎狼之強國
趙侵弱之餘燼超入險而高會仗命世之英蘭恥東瑟
之偏鼓提西缶而接刃辱十城之虛壽奄咸陽以取雋

出申威於河外何猛氣之咆勃入屈節於廉公若四體
之無骨處智勇之淵偉方鄙吝之忿悁雖改日而易歲
無等級以寄信當光武之蒙塵致王誅於赤眉異奉辭
以伐罪初垂翅於迴谿不尤青以掩德終奮翼而高揮
建佐命之元勲振皇綱而更維登峭坂之威夷仰崇嶺
之嵯峨舉託墳於南陵文違風於北阿蹇哭孟以審敗
襄墨練而授戈曾隻輪之不返縶三帥以濟河值庸主
之矜愎殆肆叔於朝市任好綽其餘裕獨引過以歸已

明三敗而不黜卒陵晉以雪恥豈虛名之可立良致霸
其有以降曲峻而憐號託與國於亡虞貪誘賂以賣鄰
不及臘而就拘垂棘反於故府屈產服於晉輿德不建
而民無援仲雍之祀忽諸我徂安陽言陟陝郭行乎漫
瀆之口憇乎曹陽之墟美哉邈乎茲土之舊也固乃周
邵之所分二南之所交麟趾信於關雎騶虞應乎鵲巢
愍漢氏之剝亂朝流亡以離析卓滔天以大滌劫宮廟
而遷迹俾萬乘之盛尊降遙思於征役顧請旋於僉祀

既獲許而中惕追皇駕而驟戰望玉輅而縱鏑痛百寮
之勤王咸畢力以致死分身首於鋒刃洞胷腋以流矢
有褰裳以投岸或攘袂以赴水傷桴楫之禍小撮舟中
之掬指升曲沃而惆悵惜兆亂而兄替枝末大而本披
都偶國而禍結臧札飄其高厲委曹吳而成節何莊武
之無恥徒利開而義閉躡函谷之重阻看天險之衿帶
跡諸侯之勇怯算嬴氏之利害或開關以延敵競遜逃
以奔竄有噤門而莫啓不窺兵於山外連鷄互而不栖

小國合而成大豈地勢之安危信人事之否泰漢六葉而拓畿縣弘農而遠關厭紫極之閑敞甘微行以遊盤長傲賓於柏谷妻覩貌而獻餐疇匹婦其已泰胡厥夫之謬官昔明王之巡幸固清道而後往懼銜檠之或變峻徒御以誅賞彼白龍之魚服挂豫且之密網輕帝重於天下奚斯漸之可長弔戾圉於湖邑諒遭世之巫蠱探隱伏於難明委讒賊之趙虜加顯戮於儲貳絕肌膚而不顧作歸來之悲臺徒望思其何補紛吾既邁此全

節兮又繼之以盤桓問休牛之故林感徵名於桃園發
閔鄉而警策邈黃巷以濟潼眺華岳之陰崖覲高掌之
遺蹤憶江使之反璧告亡期於祖龍不語怪以徵異我
聞之於孔公愠韓馬之大憝阻關谷以稱亂魏武赫以
霆震奉義辭以伐叛彼雖衆其焉用故制勝於廟算殛
揚桴以振塵繡瓦解而冰泮超遂遁而奔狄甲卒化為
京觀倦狹路之迫隘軌崎嶇以低仰蹈秦郊而始闢豁
夾塏以宏壯黃壤千里沃野彌望華實紛敷桑麻條暢

邪界褰斜右濱汧隴寶雞前鳴甘泉後湧面終南而背
雲陽跨平原而連蟠冢九峻截薛太一龍從吐清風之
颺戾納歸雲之鬱翳南有玄灞素滄湯井溫谷北有清
渭濁涇蘭池周曲浸決鄭白之渠漕引淮海之粟林茂
有鄠之竹山挺藍田之玉班述陸海珍藏張敘神皋隩
區此西賓所以言於東主安處所以聽於憑虛也可不
謂然乎勁松彰於歲寒貞臣見於國危入鄭都而抵掌
義桓友之忠規竭股肱於昏主赴塗炭而不移世善職

於司徒緇衣弊而改為履犬戎之侵地疾幽后之說惑
舉偽烽以沮衆淫嬖褻以縱慝軍敗戲水之上身死驪
山之北赫赫宗周滅為亡國又有繼於此者異哉秦始
皇之為君也傾天下以厚葬自開闢而未聞匠人勞而
弗圖俾生理以報勤外罹西楚之禍內受牧豎之焚語
曰行無禮必自及此非其效歟乾坤以有親可久君子
以厚德載物觀夫漢高之興也非徒聰明神武豁達大
度而已也乃實慎終追舊篤誠欵愛澤靡不漸恩無不

逮率土且猶弗遺而況於鄰里乎而況於卿士乎於斯時也乃摹寫舊豐制造新邑故社易置枌榆遷立街衢如一庭宇相襲渾雞犬以亂放各識家而競入籍含怒於鴻門沛跼蹐而來王范謀害而不許陰授劍以約莊搦白刃以萬舞危冬葉之待霜履虎尾而不噬寔要伯子子房樊抗憤以卮酒咀羸肩以激揚忽蛇變而龍據雄霸上而高驤增遷怒而橫撞碎玉斗其何傷嬰胃組於軹塗投素車而南袒踈飲餞於東都畏極位之盛滿

金墉鬱其萬雉峻嶒峭以繩直戾飲馬之陽橋踐宣平
之清閭都中雜還戶千人億華夷士女駢闐逼側展名
京之初儀即新館而莅職勵疲鈍以臨朝勗自強而不
息於是孟秋爰謝聽覽餘日巡省農功周行廬室街里
蕭條邑居散逸營宇寺署肆屢管庫叢芮於城隅者百
不處一所謂尚冠修成黃棘宣明建陽昌陰北煥南平
皆夷漫滌蕩亡其處而有其名爾乃階長樂登未央汎
太液凌建章縈馭娑而款駘盪輶杙而轢承光徘徊

桂宮惆悵栢梁驚雉雉於臺陂狐兔窟於殿傍何黍苗
之離離而余思之芒芒洪鐘頓於毀廟乘風廢而弗縣
禁省鞠為茂草金狄遷於霸川懷夫蕭曹魏邴之相辛
李衛霍之將銜使則蘇屬國震遠則張博望教敷而彝
倫敘兵舉而皇威暢臨危而智勇奮投命而高節亮暨
乎旄侯之忠孝淳深陸賈之優游宴喜長卿淵雲之文
子長政駿之史趙張三王之尹京定國釋之之聽理汲
長孺之正直鄭當時之推士終童山東之英妙賈生洛

陽之才子飛翠綵拖鳴玉以出入禁門者衆矣或被髮
左社奮迅泥滓或從容傳會望表知裏或著顯績而嬰
時戮或有大才而無貴仕皆揚清風於上烈垂令聞而
不已想珮聲之遺響若鏗鏘之在耳當音鳳恭顯之任
勢也乃熏灼四方震耀都鄙而死之日曾不得與夫十
餘公之徒隸齒名才難不其然乎望漸臺而扼腕梟巨
猾而餘怒揖不疑於北闕軾櫟里於武庫酒池鑒於商
辛追覆車而不寤曲陽僭於白虎化奢淫而無度命有

始而必終孰長生而久視武雄畧其焉在近惑文成而
溺五利侔造化以制作窮山海之奧祕靈若翔於神島
奔鯨浪而失水曝鱗骼於漫沙隕明月以雙墜擢仙掌
以承露干雲漢而上至致邛笏其奚難惟余欲而是恣
縱逸遊於角觝絡甲乙以珠翠忍生民之減半勒東岳
以虛美超長懷以遐念若循環之無賜較面朝之煥炳
次後庭之猗靡壯當熊之忠勇深辭輦之明智衛鬢髮
以光鑒趙輕體之纖麗咸善立而聲流亦寵極而禍侈

津便門以右轉究吾境之所暨掩細柳而撫劒快孝文
之命帥周受命以忘身明戎政之果毅距華蓋於壘和
案乘輿之尊轡肅天威之臨顏率軍禮以長擡輕棘霸
之兒戲重條侯之倨貴索杜郵其馬在云孝里之前號
惘輟駕而容與哀武安以興悼爭伐趙以徇國定廟算
之勝負扞矢言而不納反推怨以歸咎未十里於遷路
尋賜劒以刎首嗟主闇而臣嫉禍於何而不有窺秦墟
於渭城冀闕緬其堙盡覓陞殿之餘基裁岐岵以隱嶙

想趙使之抱壁瀏睨楹以忼憤燕圖窮而荆發紛絕袖而自引筑聲厲而高奮狙潛鉉以脫臙據天位其若茲亦狼狽而可愍簡良人以自輔謂斯忠而鞅賢寄苛制於捐灰墻扶蘇於朔邊儒林填於坑穽詩書煬而為煙國滅亡以斷後身刑輟以啓先商法焉得以宿黃犬何可復牽野蒲變而成脯苑鹿化以為馬假讒逆以天權鉗衆口而寄生兵在頸而顧問何不早而告我願黔黎其誰聽惟請死而獲可逮子嬰之果決敢討賊以紓禍

勢土崩而莫振作降王於路左蕭收圖以相劉料險易
與衆寡羽天與而弗取冠沐猴而縱火貫三光而洞九
泉曾未足以喻其高下也感市閭之敢井歎尸韓之舊
處丞屬號而守闕人百身以納贖豈生命之易投誠惠
愛之洽著訐望之以求直亦余心之所惡思夫人之政
術實幹時之良具苟明法以釋憾不愛才以成務弘大
體以高貴非所望於蕭傳造長山而慷慨偉龍顏之英
主胷中豁其洞開羣善湊而必舉存威格乎天區亡墳

掘而莫禦臨掩坎而累抃步毀垣以延佇越安陵而無
譏諒惠聲之寂寞弔素絲之正議伏梁劒於東郭訊景
皇於陽邱奚信譖而矜譖殞吳嗣於局下蓋發怒於一
博成七國之稱亂翻助逆以誅錯恨過聽而無討茲沮
善而勸惡咎孝元於渭塋執奄尹以明貶褒夫君之善
行廢園邑以崇儉過延門而責成忠何辜而為戮陷社
稷之王章俾幽死而莫鞠怵淫嬖之凶忍勦皇統之孕
育張舅氏之奸漸貽漢宗以傾覆刺哀主於義域僭天

爵於高安欲法堯而承禪衣終古而不刊瞰康園之孤
墳悲平后之專絜殃厥父之篡逆蒙漢恥而不雪激義
誠而引決赴丹燭以明節投宮火而焦糜從灰燼而俱
滅驚橫橋而旋軫歷敝邑之南垂門磁石而梁木蘭兮
構阿房之屈奇疏南山以表闕倬樊川以激池役鬼傭
其猶否矧人力之所為工徒斲而未息義兵紛以交馳
宗祧汙而為沼豈斯宇之獨隳由偽新之九廟誇宗虞
而祖黃驅吁嗟而妖臨搜佞哀以拜郎誦六藝以飾姦

焚詩書而面牆心不則於德義雖異術而同亡宗孝宣
於樂遊紹衰緒以中興不獲事於敬養盡加隆於園陵
兆惟奉明邑號千人訊諸故老造自帝詢隱王母之非
命縱聲樂以娛神雖靡率於舊典亦觀過而知仁憑高
望之陽隈體川陸之污隆開襟乎清暑之館遊目乎五
柞之宮交渠引漕激湍生風乃有昆明池乎其中其池
則湯湯汗汗滉漾彌漫浩如河漢日月麗天出入乎東
西旦似暘谷夕類虞淵昔豫章之名字披玄流而特起

儀景星於天漢列牛女以雙峙圖萬載而不傾奄摧落
於十紀擢百尋之層觀今數仞之餘址振鷺于飛鳧躍
鴻漸乘雲頡頏隨流澹淡瀲灩驚波唼唼葦華蓮爛
於綠沼青蕃蔚乎翠澈伊茲池之肇穿肆水戰於荒服
志勤遠以極武良無要於後福而菜蔬芣實水物惟錯
乃有贍乎原陸在皇代而物土故毀之而又復凡厥寮
司既富而教咸帥貧情同整檝權收畧課獲引繳舉效
鰥夫有室愁民以樂徒觀其鼓枻迴輪灑鉤投網垂餌

出入挺叉來往織經連白鳴榔厲響貫鰓弓尾掣三牽
兩於是弛青鯢於網鉅解頰鯉於黏徽華魴躍鱗素鱖
揚鬚饗人縷切鑿刀若飛應刃落俎霍霍霏霏紅鮮紛
其初載賓旅竦而遲御既餐服以屬厭泊恬靜以無欲
迴小人之腹為君子之慮爾乃端策拂茵彈冠振衣徘徊
鄴鎬如渴如飢心翹慙以仰止不加敬而自祇豈三
聖之敢夢竊十亂之或希經始靈臺成之不日惟鄴及
鄣仍京其室庶人子來神降之吉積德延祚莫貳其一

永惟此邦云誰之識越可略聞而難臻其極子贏鋤以
借父訓秦法而著色耕讓畔以閒田沾姬化而生棘蘇
張喜而詐騁虞芮愧而訟息由此觀之士無常俗而教
有定式上之遷下猶鈞之埏埴雖五方雜會風流涵濡
情農好利不昏作勞密邇獫狁戎馬生郊而制者必割
實存操刀人之升降隨政隆替仗信則莫不用情無欲
則賞之不竊雖智不能理明不能察信此心也庶免夫
戾如其禮樂以俟來哲

南征賦

梁張纘

歲次娵觜月惟中呂余謁帝於承明將述職於南楚忽
中川而反顧懷舊鄉而延佇汭金牛之迅渚覩靈濤之
雄壯標素嶺乎青壁聳頽文於翠嶂跳巨石以驚湍批
衝巖而駭浪鏟千尋之峭峰深萬仞之大壑隱日月以
蔽虧搏風煙而迴薄崖映川而晃朗水騰波以倏爍下
流湍而洄險上岑峯而將落於是近睇赭峰遥瞻鵲岸
島嶼蒼茫風霜蕭散值時雨之新晴觀百川之浩汙水

泓澄以闇夕山參差而辨旦忽臨晚於故鄉渺江天其
無畔獨向風而舒情寥芳洲而誰翫於是千流共歸萬
嶺分狀清江洗滌平湖夷暢翻光轉彩出沒搖漾岷山
嶓冢悠遠寂寥青湓赤岸控汐引潮界飛流於翠薄耿
長虹於青霄若夫灌莽川涯曾潭水府游泳之所往還
喧鳴之所攢聚矚寡鶴之偏叫聞孤鴻之暮侶在客行
而多思獨傷魂而悽楚

南征賦

宋
張耒

余文窮而莫諱兮顧四方其何適毋寧征於江左兮毛
土膏其可食抱朝暮之勝氣兮西山吾以為宅風余帆
乎晝日兮余朝發於赤壁標玉壘之下流兮逝蓬飛於
一息迅沮漳而橫入兮匯揚瀾於左蠡嫻吾自無恨兮
濤猛獸以噬獰霽光風於木末兮俟餞彼猶未肯平迷
失道而問津兮御於朱明就漁父而陳詞兮余非湘纍
之獨醒父告余以不治兮南樵舍而自成破隴畝而溢
流兮石險狠而當道豈舟人之肅洽兮艇觸撥而敔倒

繫余車於桑木兮猶可以徒行夷余竈使不得燔兮余
猶可以乞鄰四厚土之瀰漫兮余騷騷無以為家雖斯
懷之可人兮鳥猶長鳴而歎嗟黃蒲田之所播植兮歲
有秋而登場既狼戾而竭鄰兮已獨賦乎廩食饌上方
之玉盤兮上曰飽斯人之德歲協洽而蘄兮味柔嘉余
未得食染余指於鼎兮豈不同此臭味使持節於十郡
兮民得此父母顧余懷之倉卒兮謂一寒之何故雖解
衣推食兮曰此小惠汝弗德我我世之良醫兮藥神膏

而可以破汝腹賦余九言而九頓首兮度百世而用足
閱一世之風波兮曰餘皇吾以為歸宿

南征賦

宋
唐庚

始攝提之孟冬余負罪而南馳雪盈尺而更繁風三日
而猶吹體凍極而若無心怖甚而忘悲凡再信而至許
覺驚魂之稍歸訪景福之遺基指空郊之荒演曾禾黍
之無有矧樂梁之丹雘國已挹於三馬臣不聞於一鶚
豈當世之無儒抑此病之難藥道昆陽而流歎澹悲風

與愁雲階一夫之僭竊紛萬鬼之煩冤嗟世祖之論功
忘王章之曩言既直鉤之不食終曲突之無恩過叔子
之舊邦登峴山而痛哭方闢右之放賈蓋眼中之拔鏃
獨何心而表留卒養癰而潰肉儻遺靈之猶在當舉白
而相沃盡荆門之犖确瞰蜀江之湯湯念故人之久別
覺良晤之甘香稍回翔於澧浦忽凌亂於瀟湘時廓舒
而浩蕩復收斂而淒涼味九歌之餘哀閔三閭之孤趣
豈公子之足怨實舉國而無與內不憚於女嬃外見非

於漁父持此道以奚歸亦各安於所處自是遠矣行人
漸稀水愈激而愈清山益削而益奇造郴嶺之窮處去
湟關之故基客至此兮返顧鴈至此兮北飛眷武溪之
毒淫弔文淵之雙鑠射參狼於隴阪觀跼鳶於浪泊奮
身出於萬死騰口喧於百惡信老子之足哀覺少游之
差樂經韶陽而再宿寫石上之遺聲悟聖神之在宥如
天地之生成彼禽魚固自有理而日月未嘗不明雖吹
萬之不同吾得一而皆正舍真陽之短策放清遠之孤

舟觀碧落之靈秘嘲峽山之媚柔承懸崖之滴乳舉梟
蘿之垂樛探羊城於浩茫發蒲澗於深幽窮一時之詭
觀渺萬古之清愁蓋明年之正月矣始稅駕於羅浮

南征賦

有序

宋
李綱

仲輔賦西郊見寄次韻作南征賦報之

承嘉惠以南征兮動去國之離愁遠故園而回首兮驚
歲華之再秋覽廬阜之環秀兮俯大江之東流登黃鶴
而遐矚兮發孤照之寸眸吞雲夢於胷中兮懷浙河於

醉裏悵離羣而索居兮寄相思於一水佩蘭芷之芬芳
兮狎樵漁於汝爾終繫羈而未釋兮類蹇者之念起荷
天恩之寬大兮猶坐縻於廩食馳精爽於淮濱兮飛夢
魂於漠北悵曷日而歸休兮遂東山之釣弋老冉冉而
將至兮豈佳時之再得嘗承教於君子兮竊希風於古
人慨撫卷而擊節兮如意氣之相親每終篇而自喜兮
覺詩成之有神惟深藏而密寄兮懼夫妒者之嗔顧戎
馬之崩騰兮方四郊之多事臨洞庭而傷懷兮望九疑

而增思亂湘流而適澧兮靈均豈其前身續離騷而賦
遠遊兮願承芳於後塵與日月而爭光兮庶此道之彌
新

南征賦

宋 邢居實

嗟余生之賤兮常坎壈而多憂汨東西與南北兮無畎
畝以歸休皇六世之十祀兮竭來賓夫京師奉晨昏於
庭闈兮忽十年其於茲哀衆人之夢夢兮乘熾危以射
利驚精神於末流兮固廉士之所恥慕前哲之高蹈兮

臨川流而盥耳懼離羣之孤陋兮將遠舉而復已彼世
論之糾纏兮謂白圭為多疵何我公之潔清兮亦見尤
於盛時皇命之不可淹兮方仲春而戒行惟甲子之良
辰侍安輿而南征昔仲尼之去魯車遲遲以淹留此雖
非吾之舊邦兮猶慘慘而懷憂賓朋肅駕而來餞兮班
豆觴於水湄執余手以踟躕兮不覺涕下而霑衣輶輶
軋而不能前兮馬蕭蕭而反顧念長路之超遠兮恐白
日之云暮敕僕夫使整駕兮遂奮袂而辭去將發軔而

回首兮望國門之穹崇惟小人之眷戀兮情鬱結乎予
衷經土山之盤紆兮入空谷之豁鴻野曠蕩而無垠兮
榛林蕭條而來風鹿呦呦以鳴羣兮鳥嚶嚶而求友悵
遑遑於中野兮徒悵悵其誰咎晨脂車於諸阡兮夕稅
駕於尉氏登高丘以長嘯兮聲慷慨而凌厲想阮氏之
風流兮停予車於山椒斯人不可得而見兮寄陳迹於
蓬蒿時荏苒其不淹兮春草生兮青青羣雄挾雌以高
飛兮倉鷁得意而和鳴麥漸漸以被隴兮遵微行而徂

征欲淹留以容與兮心搖搖而靡寧平原塊莽以阨靡
兮迴極目乎百里獨煢煢以遠遊兮曾不得而少止歷
釣臺之故丘兮涉潁水之溱溱望周襄之蕪城兮弔封
人之圯墳魂飛揚而不反兮墓蕪穢而不治曾不得其
死所兮豈純孝之可恃蹇遭回於水濱兮日晡晡其黃
昏問捷徑於野人兮釋予馬於汝墳申旦展轉而不能
寐兮起視夜之何其僕夫告余以肅駕兮指明星而載
馳窮山歲寇而造天兮踐羊氏之北境企予足以長望

兮南路眇其方永經昆陽之遺墟兮聊裴回而逡巡高
城曲拂而特起兮雉堞隱嶙而猶存孤貉穴處於其下
兮鼯鼯吟嘯而成羣蒿艾蓊鬱以相依兮枳棘鬱其榛
榛悼漢氏之絕滅兮想世祖之中興方巨猾之滔天兮
恣豺狼之噬吞肆橫行於天下兮驅虎豹以為羣仗大
義而奮討兮實南土之裔孫運櫓槍而一掃兮忽電滅
而無存彼百萬之貔貅兮曾一旅之莫抗信天道之輔
順兮豈人謀之不臧迄於今幾千祀兮魂魄遊乎何鄉

冀髣髴其神靈兮步徙倚而彷徨過宛葉而弭節兮陟
方城之峩峩歎羈旅之無友兮彈劒缺而浩歌覽陵阜
之參差兮實驚熊之舊疆不修德而恃險兮曾幾何而
不亡宿上唐之候館兮聽晨鷄之悲鳴濯余纓於沁水
兮瞻桐柏之巖巖飄風嫖怒以來東兮薄寒慘淒而中
人雲漫漫以承空兮霰雪下而繽紛念往人之阻修兮
歎行役之多艱車陷淖而不進兮馬頓轡而盤跚僕夫
憔悴以懷歸兮憇章陵而南邁奠濁醪於漢祠兮顧白

水之如帶真人一去而不返兮佳氣蔥鬱而如在歷崎
嶇之九邑兮涉川路之千里心澹澹而忘食兮筋骨疲
乎鞭箠唯君子之無累兮雖九夷其可居矧神農之所
宅兮土深厚而無虞誦孔氏之法言兮疾沒世而無名
就寂寞以閑處兮非余心之所憑植木蘭以為籬兮塗
申椒以為堂蔥披靡而盛茂兮衆香郁其芬芳優游偃
息靜以索志兮又何必歸夫故鄉

南征賦

有序

明陸深

空同子陽明子同去國作南征賦

亶肅肅以宵征兮悲往路之未央懼中道之折軸兮思
改轍又惡夫無良顧僕夫以先後兮喟河廣之誰航瞻
桑梓之翳翳兮孰云忍捐夫故鄉方青春之駘蕩兮何
雨雪之縱橫白日匿其眴光兮鬱浮雲以翻揚睇山川
以無極兮陵谷杳乎其孰明祥狐嗥而風厲兮何有於
噉噉之鳳凰昔宣尼之遑遑兮固蒙笑於楚狂展直躬
以事人兮卒三黜乎舊邦慨殷室之多賢兮王子剖而

信芳荀璞玉之終在今雖屢刑又何傷謀人之國今焉
有禍而彌藏覩巨盜之乘垣今固將揭之以峻防謂余
夢寐之顛倒兮豈敢幸其必當黑白之同體兮蓋昔焉
之所常憚嬋娟之翹妒兮吾安忍利夫清揚集締綌以
禦冬兮疇駕尤於寒涼狎逆鱗而批之固以不碎為慶
也斥虎之使逝兮遭反噬未為殃也印衷之洵安兮初
未量乎得喪曩委羽於東海兮奚成功之可望矢貞心
之不泯兮瀕九死吾猶恒昔淑媛之見背兮竟結髮之

難忘悵恩情之中絕兮往將灑埽乎室堂彼良農之俶
載兮力刈乎莠與稂誕嘉穀之離離兮竟收功於千倉
度中流以失楫兮豈俟共載而劬勩燕雀安於焚棟兮
斯物知之不長服先哲之明訓兮希旁燭之煌煌神龍
之淵天兮諒所乘之允臧步中夜以顧瞻兮睨牽牛與
七襄永相望於咫尺兮庶精誠之可將仰天閭之九重
兮冀義馭之回光魂怛怛以上征兮蹇徘徊而彷徨亂
曰桂車蘭軒服騏驎兮登高臨深送征人兮懷芳握馨

遺心親兮瞻望弗及涕泗零兮

序征賦

魏
徐幹

余因茲以從邁兮聊暢目乎所經觀庶士之繆殊察風
流之濁清沿江浦以左轉涉雲夢之無陂從青冥以極
望上連薄乎天維刊梗林以廣塗填沮洳以高蹊攀循
環其萬般亘千里之長湄行兼時而易節迄玄氣之消
微道蒼神之受謝逼鶉鳥之將棲慮前事之既終亦何
為乎久稽乃振旅以復蹤泝朔風而北歸及中區以釋

勤起栖遲而無依

撰征賦

有序

宋
謝靈運

蓋聞昏明殊位貞晦異道雖景度回革亂多治寡是故
升平難於恒運剝喪易以橫流皇晉受命河汾來遷吳
楚數歷九世年踰十紀西秦無一援之望東周有三辱
之憤可為積禍纏繫固以久矣况乃陵瑩幽翳情敬莫
遂日月推薄帝心彌遠慶靈將升時來不爽相國宋公
得一居貞回乾運軸內匡衮表外清遐陋每以區宇未

統側席盈慮值天祚攸興昧弱授機龜筮元謀符瑞景
徵於是仰祗俯協順天從兆興止戈之師躬暫勞之討
以義熙十有二年五月丁酉敬戒九伐申命六軍治兵
於京畿次師於汭上雲檣千艘雷輜萬乘羽騎盈塗飛
旂蔽日別命羣帥誨謨惠策法奇於三略義祕於六韜
所以鉤棘未曜殞前禽於金墉威弧始發走鋌隼於滑
臺曾不踰月二方獻捷宏功懋德獨絕古今天子感東
山之劬勞慶格天之光大明發興於鑒寐世臣遵於原

隰余攝官承乏謬克殊役皇華愧於先雅靡盬賴於征
人以仲冬就行分春反命塗經九守路踰千里沿江亂
淮遡薄泗汭詳觀城邑周覽丘墳眷言古迹其懷已多
昔皇祖作藩受命淮徐道固苞桑勲由仁積年月多歷
市朝已改永為洪業纏懷清歷於是采訪故老尋履往
迹而遠感深慨痛心隕涕遂寫集聞見作賦擬西征俾
事運遷謝託此不朽其辭曰

系烈山之洪緒承火正之明光立熙載於唐后申讚事

於周王疇庸命而順位錫寶珪以徹疆歷尚代而平顯
降中葉以繁昌業服道而德徽風行世而化揚投前蹤
以永冀省輜質以遠傷睽謀始於著蔡違用舍於行藏
庇常善之罔棄憑曲成之不遺昭在幽而偕照賞彌久
而愈私顧晚草之薄弱仰青春之歲蕤引蔓穎於松上
擢纖枝於蘭達施隆貸而有渥報涓塵而無期歡太階
之休明穆皇道之緝熙惟王建國辨方定隅內外既正
華夷有殊惟昔小雅逮於班書戎蠻孔熾是殛是誅所

以宣王用棘於獫狁高帝方事於匈奴然侵鎬至涇自

塞及平闐郊伺鄙

原本闕四字

慕攜王之矯虔階喪亂之未

寧竊強秦之三輔陷隆周之兩京雄峭澠以制險據繞
雷而作局家永懷於故壤國願言於先塋俟太平之曠
期屬應運之聖明坤寄通於四瀆乾假照於三辰水潤
土以顯比火炎天而同人惟上相之叡哲當草昧而經
綸總九流以貞觀協五材而平分時來之機悟先於介
石納隍之誠一援於生民龜策允臧人鬼同情順天行

誅司典詳刑樹牙選徒秉鉞抗旂弧矢罄楚孝之心智
戈棘殫吳子之精靈迅三翼以魚麗襄兩服以鴈逝陣
未列於都甸威已振於秦薊灑嚴霜於渭城被和風於
洛汭就終古以比猷考墳冊而莫契昔西怨於東徂今
北伐而南悲豈朝野之恒情同萬乘之幽思歌零雨於
幽風興採薇於周詩慶金墉之凱定眷戎車之遷時佇
千里而感遠涉弦望而懷期詔微臣以勞問奉王命於
河湄夕飲餞以俶裝旦出宿而言辭歲既晏而繁慮日

將邁而戀乖闕敬恭於桑梓謝履長於庭階冒沈雲之
晦藹迎素雪之紛霏凌結湍而凝清風矜籟以揚哀情
在本而易阜物雖末而難懷眷余勤以就路苦憂來其
城頽爾乃經雉門啓浮梁眺鍾巖越查塘覽永嘉之素
維尋建武之緝網於時內慢神器外侮戎狄君子橫流
庶萌分析主晉有祀福祿來格明兩降鑒三七辭厄元
誕德以膺緯肇回光於陽宅明思服於下武興繼代以
消逆簡文因心以秉道故恩用而刑廢孝武舍已以仗賢

亦寧外而治內觀日化而就損庶雍熙之可對閔隆安
之致寇傷龜玉之毀碎漏妖凶於滄洲纏繫難而盈紀
時焉依於晉鄭國有感於百里賴英謨之經營弘兼濟
以忘已主寰內而緩虞澄海外以清滓至如昏侵蔽景
鼎作傾基黍離有歎鴻鴈無期瞻天命之貞符秉順動
而履機率駿民之思效普邦國而同歸盪積霾之穢氛
啓披陰之光暉反平陵之杳藹復七廟之依稀務役簡
而農勸每勞賞而忠甄變時雍於祖宗

原本闕
六字

埽逋醜

於漢渚滌僭逆於岷山羈巢處於西木引鼻飲於源淵
惠要襍而思贍援冠弁而來虔視冶城而北屬懷文獻
之收揚匪元首之康哉孰股肱之惟良譬觀曲而識節
似綴組以成章業彌纏而彌微事愈有而莫傷次石頭
之雙岸究孫氏之初基幸漢庶之漏網憑江介以抗維
初鵠起於富春果鯨躍於川湄匝三世而國盛歷五偽
而宗夷察成敗之相仍猶脣亡而齒寒載十二而謂紀
豈蜀滅而吳安衆咸昧於謀兆羊獨悟於理端請廣武

以誨情樹襄陽以作藩拾建業而如遺沿萬里而誰難
疾魯荒之諛辭惡京陵之譖言責當朝之憚貶對曩籍
而興歎敦怙寵而判違敵既勅而國圯彼問鼎而何階
必先賊於君子原性分之異託雖殊塗而歸美或卷舒
以愚智或治亂其如矢謝昧迹而託規卒安身以全里
周顯節而犯逆抱正情而喪已薄四望而尤眄歎王路
之中鯁蠹百越之妖燼敢凌蹈於五嶺崩雙嶽於中流
擬凶威於荆郢隱雷霆於帝坐飛鉞鏃於宮省於時朝

有遷都之議人無守死之志師旅痛於久勤城墉闕於
素備安危勢在不侔衆寡形於見事於赫淵謀研其神
策緩轡待機追奔躡迹遇雷池而振曜次彭蠡而殲滌
穆京甸以清晏撤多壘而寧役造白石之祠壇懟二豎
之無君踐掖庭以幽辱凌桃社而火焚愍文康之罪已
嘉忠武之立勲道有屈於災蝕功無謝於如仁訊落星
之饗旅索舊樓於吳餘迹階阼而不見橫榛莽以荒除
彼生成之樂辰亦猶今之在余慨齊吟於夾鳩悲唐歌

於山樞弔偽孫於徐首率君臣以奉疆時運師以伐罪
偏投書於武王迄西北之落紐之東南以振綱誠鉅平
之先覺實中興之後祥據左史之攸微胡影迹之可量
過江乘而責始知遇雄之無謀厭紫微之宏凱甘陵波
而遠遊越雲夢而南泝臨浙河而東浮穀連弩於川上
候蛟龍於中流爰薄方輿屆歐陽入夫江都之域次
乎廣陵之鄉易千里之漫漫泝江流之湯湯潄赤圻以
經復越二門而起漲眷北路以興思看東山而怕目林

叢薄路逶迤石參差山盤曲水激瀨而駿奔日映石而
知旭審兼照之無偏怨歸流之難濯羨輕紛之涵泳觀
翔鷗之落啄在飛沈其順從顧微躬而緬邈於是抑懷
蕩慮揚摧易難利涉以吉天險以艱於敵伊阻在國斯
便勾踐行霸於琅邪夫差爭長於黃川葛相發歎而思
正曹后愧心於千魂登高堞以長覽知吳淠之哀盛戒
東南之逆氣成劉后之賊聖藉鹽鐵之殷阜臨淮楚之
剽輕盛几杖而弭心怒抵局而遂爭忿爰盡之扶禍惜

徒傷於家令匪條侯之忠毅將七國之陵正衰漢藩之
治民並訪賢以招明侯文辯其誰在曰鄒陽與枚生據
忠辭於吳朝執義說於梁庭數高才於兔園惟正言而
免刑闕里既已千載深儒流於末學欽仲舒之辟容遵
縫掖於前躅對園囿而不闕下帷幙而論屬相端非之
兩驕遭弘偃之雙慝恨有道之無時步險塗以側足聞
宣武之大閱反師旅於北屢自皇運之都東始昌業以
濟難抗素旄於秦嶺揚朱旗於巴川懼帝系之墜緒故

默昏而崇賢嘉收功以垂世嗟在嗣而覆旃德非陟而
繼宰釁踰禹其必顛造步兵而長想欽太傅之遺武思
嘉遜之餘風紹素履之落緒民志應而願稅國屯難而
思撫譬乘舟之待楫象提釣之假縷總出入於和就兼
仁用於默語弘九流以挈四維復先陵而清舊宇却西
州之成功指東山之歸予惜圖南之啓運恨鵬翼之未
舉發津潭而迴邁逗白馬以憇舲貫射陽而望邗溝濟
通淮而薄甬城城陂陀兮淮驚波平原遠兮路交過面

光野兮悲橋梓遡急流兮苦磧沙賈千里而無山緬百

谷而有居被宿莽以迷徑覩生煙而知墟

原本闕
六字

謂信

美其可娛身少長於樂土實長歎於荒餘

原本闕
四字

具瘁

值歲寒之窮節視曾雲之崔巍聆悲飈之掩屑彌晝夜

以滯淫怨凝陰之方結望新晴於落日起明光於躋月

眷轉蓬之辭根悼朔鴈之赴越披微物而疚情此思心

其可說問徭役其幾時駭閱景於興沒感曰歸于采薇

予來思于雨雪豈初征之懼對冀鶴鳴之在埵

原本闕
四字

踰宿驚吾楫於邳鄉奚車正以事夏虺左相以輔湯縣
三代而享邑厠踐土之一匡嗟仲幾之寵侮遂舍存以
徵亡喜薛宰之善對美士彌之能綱升曲垣之逶迤訪
淮陰之所都原入跨之達恥俟遭時以遠圖舍西楚以
擇木迨南漢以定謨亂孟津而魏滅攀井陘而趙徂播
靈威於齊橫振餘猛於龍且觀讓通而告晞曷始智而
終愚迄沂上而停柁登高圯而不進石幽期而知賢張
揣景而示信本文成之素心要王子於雲輶豈無累於

清霄直有槩於貞吝始熙績於武關卒敷功於皇肩處
夷險以解挫弘憂虞以時順矜若華之翳晷哀飛駭之
落駿傷粒食而興念眷逸翮而思振戾臣山而東顧美
相公之前代嗟殘虜之將糜熾餘焱於海濟驅鮎稚於
淮曲暴鰥孤於泗滙託末命原本闕二字雲冀靈武之北驅
惟授首之在晨當盛暑而選徒肅嚴威以振響漸溫澤
而沾腴既雲撤於朐城遂席卷於齊都曩四關其奚阻
道一變而是乎傷炎季之崩弛長逆布以滔天假父子

以詐愛借兄弟以偽恩相魏武以譎狂宄謨奮於東藩
桴未譟於東郭身已馘於樓門審貢牧於前說證所作
於舊徐聆泗川之浮磬翫夷水之蠙珠草漸苞於埴壤
桐孤幹於嶧隅慨禹迹於尚世惠遺文於夏書紛征邁
之淹留彌懷古於舊章商伯文於故服咸徵名於彭殤
眺靈壁之曾峰投呂縣之迅梁想蹈水之行歌雖齊汨
其何傷啓仲尼之嘉問告性命以依方豈苟然於迂論
聆寓言於達莊於是濫石橋登戲臺策馬釣渚息轡城

隅永感四山零淚雙渠怨物華之推驛慨舟壑之遞遷
謂徂歲之悠闊結幽思之方根感皇祖之徽德爰識冲
而量淵降俊明以鏡鑑迴風猷以昭宣道既底於國難
惠有覃於黎元士頌歌於政教民謠詠於渥恩兼采芑
之致美協漢廣之發言強虎氏之搏翼瀾雲網於所禁
驅黔氓以蘊崇取園陵而湮沈錫殘落於河西序淪胥
於漢陰攻方城而折扃擾譙潁其誰任世闕才而貽亂
時得賢而興治救祖考之邦壤在幽人而枉志體飛書

之遠情悟犒師之通識迨明達之高覽契古今而同事
拔淵謨於潛機騁神鋒於雲旆驅斥澤而風靡蹙坑谷
而鳥竄中華免夫左社江表此焉緩帶既剋黜於肥六
又作鎮於彭沛晏皇塗於國內震天威於河外埽東齊
而已寧指西嶠而將秦值秉均而代謝實大業之興廢
心無忝於樂生事有像於燕惠抱明哲之不伐奉宏勲
而是稅捐七州以爰來歸五湖以投袂屈盛績於平生
申遠期於暮歲訪曩載於宋鄙採陽秋於魯經晉申好

於東吳鄭憑威於南荆故反師於曹門將以塞於夷庚
納五叛以長寇伐三邑以侵彭美西鉏之忠辭快韓厥
之奇兵追項王之故臺迹霸楚之遺端挺宏志於總角
奮英勢於弱冠氣盖天而倒日力拔山而傾湍始飈起
於勾越中電激於衡關興偏慮於攸吝忘即易於所難
忌陳錦而莫照思反鄉而有歎且夫殺義害嬰而愎豐
疑縲賢不策失位誰持迫理屈而愈閉方怨天而懷悲
對駿騅以發憤傷虞姝於末詞陟亞父之故營諒謀始

之非托遭哀羸之崩綱值威炎之結絡迄皓首於阜陵
猶謬覺於然諾視一人於三傑豈在已之庸弱置豐沛
而不舉故自同於俎鑊發卞口而游歷迄西山而弭轡
觀終古之幽憤懷元王之冲粹丁戰國之權爭方恬心
於道肆學浮丘以就德友三儒以成類潔流始於初源
累仁基於前美撥楚族之休烈傳芳素於來祀彊見譽
於清虛德致稱於千里或避寵以辭姻或遺榮而不仕
政直言以安身駿絕才以喪已驅信道之成終表昧世

之虧始悟介焉之已差則不俟於終日既防萌於未著
雖念德其何益爾乃孟陬發節雷隱蟄驚散葉萋柯芳
藹飾萌麥萋萋於旄丘柳依依於高城相鳴鳩之集河
觀鳴鹿之食苹沂泗遠兮清川急秋冬近兮緒風襲風
流蕙兮水增瀾調愁衿兮鑑戚顏愁盈根而蘊際戚發
條而成端嗟我行之彌日待征邁而言旋荷慶雲之優
渥周雙七於此年陶逸豫於京甸違險難於行川轉歸
弦而眷戀望脩檣而流連願開鄴之遄清遲華鑒之凱

旋穆淳風於六合溥洪澤於八埏頌賢惠於大小順規
矩於方圓固四民之獲所宜稅稷於萊田苦邯鄲之難
步庶行迷之易痊長守樸以終稔亦拙者之政焉

述征賦

明

徐禎卿

歲大呂之季律予戒行於上都愬北風之慘慄掩霏雪
以遐徂愁長路之不極詠役車於周詩聊騁目以宣憂
愴懷土而興思歷維揚之故域背大江之皇陂悲窮野
之寥闕愁淮陰之城隅訪王孫之遺蹟謁漂母於空祠

哀智傑之有窮亶民生之多罹惟往昔而顧念心搖搖而夕悲逮明發而振楫遂慷慨以遐辭

小征賦

有序

明
皇甫孝

予以孟冬治逋於衛墟作小征賦

歲孟冬之慘烈兮予有事乎汲城晨雨霽之遄阻兮暮指途而遂征風飄飄以升輿兮日杳杳而抗旌露夜下而羈旅兮魂營營之靡寧詠詩人之遙役兮瞻岵岵而疚情徧黃丘而息駕兮矚行阜而南邁伊故鄉之永懷

兮氣交憤而長喟雪氛氲而蔽天兮憫征人之無衣野
寂寞其遶迴兮雲孤泊而靡依感鴻鳥之違寒兮鳴邕
邕以羣飛過邑墟而有懷兮訊滑臺以延佇漸淇水之
湯湯兮激衝波於迴渚美氓蚩之困悔兮悟漢廣於求
女願履幽而反正兮年冉冉而不與遵河津以遐驚兮
停予車於衛郊諒取辟之不遠兮信昊天之孔昭彼既
耄而警訓兮宜令名之益邵嗟弱植之易遷兮憚我辰
之不遭期浚谷之考槃兮隘碩人之弗告苟委順而弘

觀兮從吾好而自足終秉耒以絕榮兮永放歌於巖曲



御定歷代賦彙外集卷九

欽定四庫全書

集部

御定歷代賦景外集卷十

詳校官檢討_臣劉 炘

主事銜_臣徐以坤覆勘

總校官編修_臣王燕緒

校對官中書_臣陸 湘

謄錄監生_臣馮光熙

欽定四庫全書

御定歷代賦彙外集卷十

行旅

述行賦

有序

漢
蔡邕

延熹二年秋霖雨逾月是時梁冀新誅而徐璜左官五
侯擅貴於其處又起顯明苑於城西人徒凍餓不得其
命者甚衆白馬令李雲以直言死鴻臚陳君以救雲抵
罪璜以余能鼓琴自朝廷敕陳留郡守遣余到偃師病

不前得歸心憤此事遂託所過述而成賦

余有行於京洛兮邁淫雨之經時塗迤邐遭其蹇連兮潦
汙滯而為災馬桀蹢而不進兮心鬱悒而憤思聊弘慮
以存古今宣幽情而屬詞久余宿於大梁兮誚無忌之
稱神哀晉鄙之無辜兮忿朱亥之篡軍歷中牟之舊城
兮憎佛肸之不臣問甯越之裔胄兮藐髣髴而無聞經
圃田而瞰北境兮晤衛康之封疆迄管邑而增感歎兮
愠叔氏之啓商過漢祖之所隘兮弔紀信於滎陽降虎

牢之曲陰兮路丘墟以盤縈勤諸侯之遠戍兮侈申子
之美城稔濤塗之復惡兮陷夫人以大名登長坂以凌
高兮陟蔥山之寔峭建撫體而立洪高兮經萬世而不
傾迴峭峻以降阻兮小阜寥其異形岡岑紆以連屬兮
谿谷賈其杳冥迫嵯峨以乖袞兮廓巖壑以崢嶸攢棧
樸而雜榛楛兮被浣濯而羅布疊莢萸與臺茵兮緣層
崖而結莖行遊目以南望兮覽太室之威靈顧大河於
北垠兮瞰洛汭之始并追劉定之攸儀兮美伯禹之所

營悼太康之失位兮愍五子之歌聲尋脩軌以增舉兮
邈悠悠之未央山風泊以飈涌兮氣燥燥而厲涼雲鬱
術而四塞兮雨濛濛而漸唐僕夫疲而劬瘁兮我馬虺
隤以玄黃格莽丘而稅駕兮陰曠曠而不陽哀哀周之
多故兮眇瀕隈而增感忿子帶之淫逆兮唁襄王於壇
坎悲寵嬖之為梗兮心惻愴而懷燥乘舫舟而汴湍流
兮浮清波以橫厲想宓妃之靈光兮神幽隱以潛翳實
熊耳之泉液兮總伊瀍與澗瀨通渠源於京城兮引職

貢乎荒裔操吳榜其萬艘兮克王府而納最濟西溪而
容與兮息輦都而後逝愍簡公之失師兮疾子朝之為
害玄雲黯以凝結兮集零雨之溱溱路阻敗而無軌兮
塗溽溺而難遵率陵阿以登降兮赴偃師而釋勤壯田
橫之奉首兮義二士之夾墳佇淹留以候霽兮感憂心
之殷殷并日夜而遙思兮宵不寐以極晨候風雲之體
勢兮天牢湍而無文彌信宿而後闕兮思遠迤以東運
見陽光之顥顥兮懷少弭而有欣命僕夫其就駕兮吾

將往乎京邑皇家赫而天居兮萬方徂而並集貴寵扇
以彌熾兮僉守利而不戢前車覆而未遠兮後乘驅而
競入窮變巧於臺榭兮民露處而寢濕清嘉穀於禽獸
兮下糠粃而無粒弘寬裕於便辟兮糾忠諫其駸急懷
伊呂而黜逐兮道無因而獲入唐虞眇其既遠兮常俗
生於積習周道鞠為茂草兮哀正路之日湮觀風化之
得失兮猶紛拏其多違無亮采以匡世兮亦何為乎此
畿甘衡門以寧神兮詠都人而思歸爰結蹤而迴軌兮

復邦族以自綏亂曰跋涉遐路艱以阻兮終其永懷窘
陰雨兮歷觀羣都尋前緒兮考之舊聞厥事舉兮登高
斯賦義有取兮則善戒惡宜云苟兮翩翩獨征無儔與
兮言旋言復我心胥兮

敘行賦

晉
張載

歲大荒之孟夏余將往乎蜀都脂輕車而秣馬循路軌
以西徂朝發軔於京寓兮夕予宿於穀洛踐有周之舊
墟陟丘荒以寥廓讚王孫於北門問九鼎於東郭實公

且之所卜曷斯水之噴薄入函谷而長驅歷新安之西
阜行逶迤以登降涉二嶠之重阻經欽岑之險巖想姬
丈之避雨出潼關以迴逝仰華嶽之崔嵬勤大禹之疏
導豁龍門之洞開舍予車以步趾翫卉木之璀璨翳青
青之長松蔭肅肅之高柞緣阻岑之絕崖蹈偏梁之懸
閣石壁立以切天岌嵬其欲落超陽平而越白水稍
幽夢以迴深乘重巒之百層轉木末於九岑浮雲起於
轂下零雨集於麓林上昭晰以清陽下杳冥而晝陰聞

山鳥之晨鳴聽玄猿之夜吟雖處者之所樂嗟寂寞而
愁予心造劍閣之崇關路盤曲以晦藹山崢嶸以峻狹
仰青天其如帶兼習坎之重固形束隘以要害豈乾坤
之分域將隔絕乎內外

遊居賦

漢
班彪

夫何事於冀州聊託公以遊居歷九土而觀風亦哲人
之所虞遂發軔於京洛臨孟津而北厲想尚父之威虞
號蒼兕而明誓既中流而歎息美周武之知性謀人神

以動作享烏魚之瑞命瞻淇澳之園林善綠竹之猗猗
望常山之峩峩登北嶽而高遊嘉孝武之乾乾親飾躬
於伯姬建封禪於岱宗塵玄玉於此丘徧五岳於四瀆
觀滄海以周流鄙臣恨不及事陪後乘之下僚今匹馬
之獨征豈斯樂之足娛且休精於敝邑聊卒歲以須臾
晉郭璞

流寓賦

晉郭璞

戒雞晨而星發至猗氏而方曉觀屋落之隳殘顧但見
乎丘隴嗟城池之不固何人物之希少越南山之高嶺

修焦丘之微路駭斯徑之峻絕感王陽而增懼詰朝發
於解池辰中暨乎河北思此縣之舊名蓋曩日之魏國
詠詩人之流歌信風土之儉刻背茲邑之迴逝何險難
之多歷望陝城於南涯存虢氏之疆場實我姓之攸出
邈有懷乎乃迹陟函谷之高關壯斯勢之險固過王城
之丘壟想穀洛之合關惡王靈之殯流奇子喬之輕舉
遊華輦而永懷乃凭軾以寓目思文公之所營蓋成周
之墟域

述羈賦

梁簡文帝

奉明后之霑渥將遠述於衡楚歎雲霞之宜漫對江山
之遙阻是時孟夏首節雄風吹甸晚解纜乎鄉津涕淫
淫其若霰舟飄飄而轉遠顧帝都而裁見遠山碧暮水
紅日既宴誰與同雲嵯峨而出岫江搖漾而生風奉璽
言而遙邁改余玉於江隈遵陽塗而中正軫悲心其若
頽引領京邑瞻望弗遠戀逐雲飛思隨蓬卷觀江水之
寂寥願從流而東反

愍塗賦

梁沈約

結榜窮渚思臨長嶼情依舊越身經故楚彼長路之多
端伊客心之無緒歡因循而易失悲由心而難拒此北
海之信遼知余思之方阻日掩長浦風埽聯葭疊雲凝
憤廣水騰華聽奔沸於洲嶼望暎曖乎煙沙依雲邊以
知國極鳥道以瞻家免悽愴於羈離亦殷勤於行路歎
余塗之屢蹇奚前芳之可慕

去故鄉賦

梁江淹

日色暮兮隱吳山之丘墟北風析兮絳花落流水散兮
翠莖疎愛桂枝而不見悵浮雲之離居迺凌大壑越滄
淵汙汙積水陵陵斷山窮陰匝海平蕪帶天於是泣故
關之已盡傷故國之無際出汀洲而解冠入溱浦而捐
袂聽蒹葭之蕭瑟知霜露之流滯對江皋而自憂弔海
濱而傷歲撫尺書而無悅倚樽酒而不持去室宇而遠
客遵蘆葦以為期情嬋娟而未罷愁爛漫而方滋切趙
瑟以橫涕吟燕筇而坐悲乃歌曰芳洲之草行欲暮桂

水之波不可渡絕世獨立兮報君子之一顧是時霜翦
蕙兮風摧芷平原晚兮黃雲起寧歸骨於松柏不買名
於城市若濟河無梁兮沈此心於千里重曰江南之杜
蘅兮色以陳願使黃鸝兮報佳人橫羽觴而掩望撫玉
琴兮何親瞻層山而蔽日流餘涕以沾巾恐高臺之易
晏與螻蟻而為塵

出門賦

唐
歐陽詹

出門辭家兮人有志而思遲予紛然以遠遊別天性之

至慈去人情之好仇嚴訓誡予以勿久指蒲柳以傷秋
弱室咨予以遠歸目女蘿而起愁心眷眷以纏綿淚浪
浪而共流暢懷安以敗名曾何可以少留於是驅忠信
以為車執藝業以為贄越三江而踰五嶺望堯旌以求
試庶以程功取爵建德揚名獲甘旨以報勤光畫錦以
迴衡如弧斯張如鳥斯征射百步而期中非三年而不
鳴騶騶天寒崢嶸歲晚鵲聯翩而不定蓬悠揚而自轉
速前程之尚遙顧所離而日遠事紛拏以爭校情交戾

而不和退藩籬則弱羽戀於雲路激龍門則纖鱗限乎
尺波身違日日之晨昏懷戀戀而莫遣親益年年之羸
老思搖搖而若何慙靈輒於困窮舉冀缺於隴畝一仁
聲之永大一孝德之茲久伊錫類以極窮豈今無而昔
有爾乃循否泰而俟命點風塵以食艱苟疏溟而納流
願覆簣以成山路實多岐紛無定色任玄黃之濡染信
疆理之南北管因媒而解縛越自遇而升車虞先榮而
後悴姜始卷而終舒傷哉數子之稅駕吾未知其所如

臨舟賦

晉 應 貞

陟繇岡之迢邐臨窈谷之濬遐覽丹源之冽泉眷懸河
之清波漱玄瀨而漾沚順黃崖而蕩博激重巖之絕根
拂崇丘之飛甍然後陰渠洞出陽澮旁開條媚高鶩皓
暍長懷盤溢鬱沒雲轉颺迴屏側為之飛隕壁岸為之
波墮列以青林蔭以綠枝檉松蓊茸於其側楊柳婀娜
乎其下高溜承崖懸泉屬嶺別流分注冰瑩玉靜清波
引鏡形無遁影

滯舟賦

唐
蕭穎士

攝提歲拂衣海嶽應調函洛詠佩服之皋蘭美繫維之
場藿徵良圖以趨事窘中道以摧落昔謬價於當年今
後來之不若衆飛下以抵熾余矩桷而規鑿悲介直之
不可媒想雲林以自託眷眷離憂行行獨愁遭我車而
北上竭吾道以東遊愛遲遲之暮春登泛泛之輕舟過
巖邑以信次纜縈波之下流於時丙丁守位恢台肇節
朱雲四騰瑤草半歇景沖沖而熾早風翳翳以歆熱赫

中潭之平沙滲通川而殆竭則有危檣巨舸長艤廣艘
龍翼錦舳雀顧方艚材木蘭兮竹箭紉齒革與羽毛頓
修竿於迴塘駢曲岸以戢篙於是迅拏輕檣河舫漢艇
乘時汧洄赴利馳騁混漁商而沸雜期數日而俄頃事
也時哉咸適其才吁嗟大艦安得而來借如三江五湖
之渺漫礫石飄沙之汨渙望赤岸以天低臨清波而景
沒峻艫衝濤以直透高帆雲卷而上葦朝發乎荆衡夕
止乎揚越晷刻千里之外一何去留之倏忽彼斗筭鍾

曷之餘提徑趨時之未曾壓溺以不暇亦何知於歲月
材微則致遠而自覆量大則俟時而可貴苟或喻於窮
通又奚分於器類運之來也賈長淵高視於三台謀不
用焉梅子真近辭於一尉吾將斂策以飲氣覩維舟而
歛歛

歸途賦

有序

宋
謝靈運

昔文章之士多作行旅賦或欣在觀國或怵在斥徙或
述職邦邑或羈役戎陳事由於外興不自己雖高才可

推求懷未愜今量分告退反身草澤經塗履運用感其
心賦曰

承百世之慶靈遇千載之漫渥匪康衢之難踐諒跬步
之易局踐寒暑以推換眷桑梓以緬邈褫簪帶於窮城
反巾褐於空谷果歸期於願言獲素念於思樂於是舟
人告辦佇楫在川觀鳥候風望景測圓背海向溪乘潮
傍山悽悽送歸悠悠告旋時旻秋之杪節天既高而物
衰雲上騰而鴈翔霜下淪而草腓舍陰漠之舊浦去陽

景之芳蕤林乘風而飄落水鑒月而含輝發青田之枉
渚逗白岸之空亭路威夷而詭狀山側背而異形停余
舟而淹留搜縉雲之遺迹漾百里之清潭見千仞之孤
石厯古今而長在經盛衰而不易

阻歸賦

梁簡文帝

觀建國之皇王選能官於前古元帝慈而布教豈齊聖
而作輔伊吾人之固陋宅璇漢而自通躡九枝而耀景
總六翮而搏風屬玄珎之啓異逢玉弩之相驚頓天羅

於八表騰雲驅於四溟發伏龍之雄氣耀策馬之高星
地通朔易彊鄰北極墮樹饒風胡天少色上月斜臨寒
松遙直雲向山而欲斂鴈疲飛而不息何愁緒之交加
豈樹萱與折麻聞繁鉦之韻冰聽流風之入笳終知客
遊之阻無解鄉路之賒

還林賦

有序

梁丘遲

爰自京師言歸舊嶺今風古轍每動寸衷因事而書不
覺成卷非謂為文聊記行途所經云爾

太皞弭節祝融聳駕炎鐘汎響青籥靜吹丘子稅轅畿
路總舳川湄褫魂故嶺結夢舊堦揆身世而載懷鏡古
今而興辭驗難停於楊轍昭易改於墨絲匪追舉而辨
命豈適尹而問著擔簦無白璧之想負書靡黑貂之悲
纜解山潮首顧京滙仰絳堞之紛迴與素津之容裔荃
撓往來芰葢經過依稀子陵之釣髣髴滄浪之歌出入
風霞游息雲露階迴禽飛窻高月度踟躕七教徘徊五
禮永翦帶於關上長緝巾乎林底

將歸賦

唐 歐陽詹

憶求名於薄藝曾十稔以別離纔還鄉以半齡又三年
於路岐紅顏匪長白日如馳冉冉皆盡悠悠為誰親有
父母情有閨闈居唯苦飢行加相思加相思兮寧苦飢
辭家千里兮欲與偕歸南陔之蘭北山之薇一芳一菲
何是何非歸去來兮秋露霑衣

辭行李賦

陳 江總

維大梁三十有六載神功懋乎開闢垂恩儲社壓子代

之盤盂盛德形容陋周年之奔石月窟向風日域仰澤
要荒欵塞諸戎重譯輶軒巡履聲芳亥步旌節經過事
高禹跡舉皇華之盡美馳珥玉之多事或江夏之無雙
匹洛陽之才子訪羽儀於廊廟旌秀異於杞梓引強學
之三端賞彫文於四始顧德侔於罕志奉朝章於信次
天鳳舉而張旗濟龍沙而通贊敏異季札之聽歌譽乘
屬國之銜使懷蘇子之抵掌憶千秋之畫地願自勵而
飲冰揆無庸而按轡嗟負恩之無力每若寘於叢棘條

辭東平之樂善再踐承明而游息豈異千里之奔蹏寧
辭一錢之不直諒無期於鴻漸念有似於蟬翼荷德澤
之霑然鑒丹愚之匪飾慙借譽於瑟柱免長徭於菴極
聊暇日以須臾每長吟以鬱紆異金石之能固若草木
之分區進學慙於枝葉絲力謝於康衢構伯休之蓬戶
狎仲憲之桑樞徒悅水而非智底因谷以為愚恥矯名
於周客寧濫響於齊竽奉棲遲以偃仰願太素之不污

送君南浦賦

以越空縣目傷
妾是君為額

唐

黃滔

南浦風煙傷心渺然春山歷歷春草繚繚那堪送行客
起離筵一時之萍梗波濤今朝惜別千里之秦吳燕宋
何日言旋當其繫馬出船候潮待月低徊而少婦對景
愴恨而王孫望闕莫不撚懈竹以淒楚撥湘絃而激越
且當蘋澗把芳酒以留歡莫被薰風吹片帆而便發君
不見陌上塵中奔西走東車輪似水馬足如蓬夜泊而
猿啼霜樹晨征而月在煙空爭得枝間比翼更同於越
鳥只應波上離羣便逐於燕鴻莫不太苦行人偏傷別

妾龍媒而嘶出金埒鸞扇而持歸玉篋於時莫展歌顰
全沈笑靨郊天路口愁攀夾渡之柳條採蕨山前忍看
解維之桂楫是知無人免別有別皆傷使人落顏貌枯
肺腸淚成雨鬢侵霜朝悲五嶺暮怨三湘夢去不到書
來豈常況一川之煙景茫茫橫衝楚徼兩岸之風濤渺
渺直截炎荒無不銷魂如何舉目齎行而寶劍三尺留
下而明珠十斛林駢樛木摧誠而敢望合歡洲躍嘉魚
取信而當期剖腹及夫樂闕人散龜飛日曛遺鞭却取

解珮還分玉驄之歸步愁舉蘭棹之移聲忍聞須知赤
帝之江頭兩心似火莫自蒼梧之岸曲一去如雲雖佇
錦衾而贈我終攜錦字以醺君已而誰不別離別離如
此誰不相送相送於是則東門與北梁不足云爾

送將歸賦

宋 蔡 確

昔人之言秋意也曰若在遠行登山臨水送將歸此其
平日遊子之所悲怨慕悽愴尚不能自支而況於予乎
戀高堂之慈愛積三歲之違離余親屬子以侍我行且

復命於庭闈其送子也乃在粵嶺之南溟海之西洗亭之側瀘水之湄出門躑躅以將別仰天涕泗之交頤浮雲為我變色行路為我齎咨而況於子乎余方省愆念咎藿食布衣髮如秋霜形如槁枝子見吾親勿以告之明明二聖仁如天也雷霆雨露固有明也孤臣放逐久當憐也晨夕定省歸可期也子告吾親其以斯也乎天下之險處乎人跡之稀觸氛霧以深入仗忠信而不疑以余之故而兩走乎萬里嗟如子者其誰周楚之郊余

親所棲瞻彼白雲予留子馳安得借翰於鴻鵠徑從子而奮飛也

遠行送將歸賦

有序

宋陳普

余寓杭友人楊孔璋告余以先歸賦采薇以見贈讀之駸駸乎不滓矣余因九辯首句適與吾今日之事合遂聊以題吾送別之篇曰遠行送將歸以為采薇之答

芙蓉江邊今日淒淒暮雲無燕兮南鴈飛飛惓惓兮遠行登山臨水兮送將歸歸兮歸兮何所載兮東書淒涼

以寂寥屈原騷紫陽易兮此何所有嗟意足而氣驕去
家而泛江湖兮日月半乎歲周東探禹穴兮登秦望而
窺泱泱笑句踐宇宙狹兮弔蘭亭倉卒為荒丘西涉浙
湍兮出三吳而見淮山盤龍踞虎石怒角而撐髯兮顧
甘困卧而摧顏奔淙春突乎足下兮茲流何日而安安
北渡烏江兮問項籍何兒女獨夫而爭天下兮螻螳而
負萬石之鐘簾千金萬戶豈能得汝頭兮上帝之怒戮
汝兩淮一目千里兮耒耜戢戢不知為誰耕坐城中者

誰兮得無耳塞而目盲柰汝轍鮒何兮遲我不知幾年
為汝挽西江歷歷山川與古今兮嗟心鬱結而莫舒宇
宙之大誠足以助吾浩然兮其如莞獨鰥寡之為魚悠
悠當世之人兮坐厝火而望太虛紛紛爭食之徒兮敝
衣棍蟻與蝨鮑車糾絞乎蟲蛆欲於此而售吾說兮若
資珍鬣懷象掃南鬻斷髮而取贏餘欲於此而容吾足
兮如衣縫掖表絺綌西之裸國而卜居身既靡所措兮
匪采薇其焉往嗟予與子同兮子獨歸而我猶海之上

歸理松竹兮收集猿鶴朝誦中庸兮夜讀大學余將奔
若乎其後兮期共老乎丘壑

東還賦

唐
李觀

我思西來兮猶前日之未賒歲迴復兮倏歷五稔如一
息歟咄嗟我道甚直兮志甚迂若陟景之無所涉川之
無涯今雖非乎乘車如輟除道亦遮乎執笏而我之還
家我之家兮逼江濳而臨海溼其地則古有吳王之夫
差十代之風兮但傳乎稽古數畝之宅兮不樹乎桑麻

親之慈兮兄之友與予之弟悌常澣衣而非食吾安得
以天役役此還之為華乃命僕以詰朝而必上道問何
有則曰始來之寶刀經笥其外則毫末而無加於是乃
出國門而東驚乃賦其言曰東還兮直書吾意而罔差
風蒼茫兮候入八月灞上之日西南斜城中之人或持
酒肉以送我覩夫車馳馬顛兮無非別者之為邪繇是
酒不飲兮肉不御咸回回兮一江而歌苟天下之人兮
離合之若此矧吾高堂為念之謂何乃三肅而行順彼

長道忘自東南之相遇

南歸賦

明梁寅

感陽春之方殷兮發孤旅之遐思
出都門以曠望兮具舟楫而南歸
迺迴瞻於帝居兮薄中天之虹霓
像紫宮以焦嶢兮貫黃道以逶迤
壯麒麟之兀兀兮聳天祿之巍巍
吾固樂金門之高步兮願叅白虎之羣議
顧年邁而力罷兮迺形瘵而心急
麋鹿藏於深林兮鳳鸞集夫熙世
審物情之既異兮君子盍量其才器
虞德隆兮三

禮明漢業建兮朝儀興煌煌乎大明之盛典兮爰稽式
而告成延搢紳以博諏兮蒐巖穴而旁徵慙齊竽之濫
列兮愧趙鐸之希聲承賜金之渥恩兮荷錫服之殊榮
詔許歸而佚老兮循初服以紓情朝發櫂於龍灣兮夕
余憇夫采石歷曲洲之坡陀兮臨廣隰之泓澤雨浪浪
而驟響兮雲黝黝而凝色神魚驤其頌首兮旋鴻馳其
迅翼嗟吾行之猶滯兮望匡廬而不迫昔余之棲壑兮
固安夫寥闕也犯波濤以往還兮今何為而役役也呂

望之漁釣兮樹興王之績也甯戚之飯牛兮竟以相國
也吾誠不及古之人兮寧守夫窮獨之節也金以利而
為劍兮木以直而為楹在治忌夫踴躍兮在山焉能以
自呈賢願進而效用兮愚思退而全名或違道以干譽
兮寧身困而心亨謂斯言之匪忱兮指江水以為正亂
曰楚山礧礧雲溶溶兮返吾故廬不悲不逢兮羞彼齷
齷釋忡忡兮涵泳聖澤希淳風兮懷空谷之賢兮賦白
駒而從之

傷遠行賦

唐白居易

貞元十五年春吾兄吏於浮梁分微祿以歸養命予負
米而還鄉出郊野兮愁予夫何道路之茫茫茫茫兮二
千五百自鄱陽而歸洛陽朝濟乎大江暮登乎高岡山
有險兮路屈曲甚孟門與太行楓林鬱其百尋涵瘴煙
之蒼蒼其中闕其無人唯鷓鴣之飛翔水有含沙之毒
蟲山有當路之虎狼況乎雲雷作而風雨晦忽電靄兮
不見日陽涉泥濘兮僕夫重脰陟崔嵬兮征馬玄黃步

一步兮不可進獨中路兮傍徨噫昔我往兮春草始芳
今我來兮秋風其涼獨行踽踽兮惜晝短孤宿煢煢兮
愁夜長況太夫人抱疾而在堂自我行役諒夙夜而憂
傷惟母念子之心心可測而可量雖割慈而不言終蘊
結乎中腸曰有弟兮侍左右固就養而無方雖溫清之
靡闕詎當我之在傍無羽翼以輕舉羨歸雲之飛揚惟
晝夜與寢食之心曷其弭忘投山館以寓宿夜繚繚而
未央獨展轉而不寐候東方之晨光雖則驅征車而遵

歸路猶自流鄉淚之浪浪

近遊賦

晉束皙

世有逸民在乎田疇宅彌五畝志狹九州安窮賤於下
里冥玄淡而無求乘簞輅之偃蹇駕蘭單之疲牛連捷
索以為鞅結斷梗而作鞅攀華門而高蹈揭徘徊而近
遊井則兩家共一園必去舍百步貫雞輶於歲首收雞
雛於物互其男女服飾衣裳之制名號詭異隨迭設繫
襦以御冬費汗衫以當熱帽引四角之縫裙為素條之

殺書兒啼於客堂設杜門以避吏婦皆卿夫子呼父字
及至三農閒隙邁結婚姻老公戴合歡之帽少年著叢
角之巾

續遠遊賦

有序

宋 李 綱

屈原作遠遊章句文采瓌麗於騷辭中最為有理致者
予方以金僊氏之書麗濯其心慨然思往見之作續遠
遊賦以寓意焉其辭曰

悲塵寰之喧卑兮願遠遊以自適恍形止而心馳兮託

夢魂而有得漠虛靜以無為兮絕氛埃而奔逸登泰山
以小天下兮望滄溟而笑河伯走蒼梧於南荒兮過崆
峒於西極忽神馬而尻輿兮歷萬里而一息曾不足以
慊吾之志兮將往遊於廣漠之國會萬期於須臾兮步
八紘於咫尺觀天地之所以浮沈兮究日月之所以出
入爰整吾御兮駕言西之左王良而右伯樂兮服山子
而駢盜驪陟閼苑於崑崙兮見王母於瑤池聽白雲黃
竹之歌兮不勝其悲迴車竭來兮巡海之涯聞海中之

神山兮有方丈與蓬萊六龜舉首以迭戴兮仙聖飛騰而往來泛陵波之巨航兮操五種以自隨風輒引舟而不可到兮怡懽悅而傷懷乘風御氣兮造夫天關抵營室歷閣道兮是為紫微之垣執招搖步瑤光兮瞻太乙肅鈞陳於帝傍玉女投壺而笑兮雷電若以奔騰虎豹守闕而不可入兮雖欲自達而無因悵吾將誰適從兮其惟西方之聖人嚴清淨之佛土兮闢廣大之法門目淨修廣如青蓮兮舌相廣長而無不聞以一音而演說

今普滋發於諸根寶樹森以行列今天花散而繽紛菩
薩聲聞環以圍繞今天龍八部儼以威神倏一念而往
詣今稽首禮足而欽承俾化人以導予今游華藏於無
垠從一佛國至一佛國今若河沙與微塵咸廣博而嚴
淨今羌難得而備云迴視五濁惡世之衆生今若一器
之聚螽悅驚悟而永歎今何所夢之明明覽六合而遊
十方今曾弗離乎一身惟茲方寸今漫然無際含容大
千今山河大地用之以小今始有分劑如以大海納於

蹄涔兮如以毒藥置於寶器舍無價之寶珠兮競錐刀
之末利棄瀛渤之全潮兮認浮漚之微體蠻觸國於蝸
角兮時相與戰而流血千里南柯夢於蟻穴兮黃梁未
熟而榮華一世彼區區之利害兮亦與此而何異惟還
觀而照寂兮廓靈府於無外泯六鑿於天游兮其孰能
以芥蒂絲發心以証道兮可一超而已至吾方從事於
斯兮等浮生於一戲

遠遊賦

有序

明

袁袞

余弱冠登朝讀書中秘繼官刑曹調武選武庫災編成
湖州赦歸蒙薦起為南武選選職方署員外郎尋有廣
西之命昔孔子欲居九夷不以為陋廣西古百粵也今
海內同軌且余既仕矣安敢以遠辭乎爰作遠遊賦以
述事抒情焉其辭曰

沐鴻私於嘉運兮擢遺側於樊丘曳華綬以登進兮踐
舊京而嬉遊幸朝野之無事兮肆驩虞而靡憂謝文墨
之填委兮稽圖牒以詔搜差穀旦以休息兮爰嘯侶以

集儔升北山以遐眺兮溯大江而榜舟或閱武於廣場
兮或被袂於清流尋廢興於六代兮仰駿業於皇猷念
無荒之有成兮信佚樂而不偷乏佐時之奇畧兮竟投
裔於僻陬駭顏駟之龐眉兮怪馮唐之白首歎滯淹於
更生兮笑浮沈之楊叟羞子安之巧宦兮蒙良史之譏
醜偉潘仁之拙政兮賦閒居而不朽衆捷徑以窘步兮
固余顏之所厚獨修姱以委順兮諒余心之所取苟貪
婪以競進兮寧坎壈以自守昔孔聖之周流兮居九夷

而弗陋羌下惠之直道兮遭三黜而無咎顧檣櫓之非
材兮雖棄捐其何有奉簡書以畏忌兮戒僕夫而啓行
出攜李之下邑兮遊臨安之故城痛越霸既不終兮宋
社又以圯崩肅陽侯以先驅兮遵剡水以揚舲感錢鏐
之雄武兮提尺劔以縱橫悼伍胥之忠憤兮浮鴟夷以
殞身忽怒濤之山立兮儼白馬以耀靈沿桐江以容與
兮憇嚴瀨之澄清躡高臺以長嘯兮懷哲人之典型於
是芳歲將徂玄冬告畢雨濛濛其下淫兮雪霏霏以蕭

瑟露霧暄以冥冥兮同雲暖其無色鴈雖離而南翔兮
日忽忽其西匿坐修夜之難旦兮步列星以太息繹甯
越之曩歌兮材士顛顛而失職心佗傺以紆軫兮思絳
結而瞋惑水泉涸其不流兮石巉巖而阻塞既僵佗以
川浮兮復崎嶇而山陟野蕭條而無人兮獸躑躅以屏
跡愁車殆而馬煩兮汨吾朝征而夕于役形枯槁以渴
饑兮精消鑠而內蝕魂涸瀆以踰佚兮涕浪浪而霑臆
撫壯年之不居兮恥修名之未立於是歷甌粵觀豫章

攀傑閣於江渚兮詠瑋辭以徬徨帝子不可作兮王生
亦已淪亡睇彭蠡之巨浸兮追鴻伐於高皇想湖水之
盡赤兮殪元兇於大黃翦鯨鯢於溟渤兮陋鉅鹿與昆
陽謁羣忠於叢祠兮覩丹青之耿光甄孫許之壯烈兮
實後先以相望咸致命以竭節兮終身滅以名揚越臨
江以信宿兮矚玉筍之崇岡侈降禪於漢武兮欽登封
之閭藏忽獻歲以發春兮迴青陽於幽谷鳥嚶鳴其相
和兮麗冬榮之嘉木悲去鄉其日遠兮時反顧以蜷局

子牟皇皇以戀闕兮嗣宗途窮而慟哭何賢哲之達觀
兮猶委心於榮辱諷龍蛇之至言兮勵浮雲以自勗聳
韓廟於袁疆兮哀逢辰之不淑黜百家以述聖兮排二
氏以箴俗雖馴鱷以開雲兮卒罹殃而貶逐弔楚纍於
江潭兮披騷經而三復椒蘭妒而構讒兮嫉蛾眉而謠
詠怨靈修之不化兮傷郢都之傾覆式彭咸以自靖兮
葬汨羅之魚腹涉長沙以夙駕兮嗟賈生之天年遭漢
文之殊遇兮何卒困乎絳灌之巧言闕宣室以徒召兮

賦鵬鳥而自憐挺異才以命世兮竟齎志於重泉亂衡
陽之洪河兮厲沅湘之大川覽吳楚之上游兮極耳目
之偉觀瞻柳侯於永郊兮薦繁蔭以羞筵世溷濁而壅
塞兮紛妒忌以蔽賢慨四子之一轍兮羌異代而同患
士不遇以永歎兮諒自古而已然望朱垠以儗裝兮指
象郡而驤軌肆流目於九疑兮悵重華之野死蒼梧曼
曼以在望兮悼二妃於江之汜山籠從以造天兮嵐昏
昏而晝起桂樹叢生於巖阿兮春炎炎其若暑壤濱海

以沮如今土墊濕而恒雨猺獠娛以伺人兮咸雕題而
黑齒蝮蛇蓁蓁於中林兮貳含沙於淵水雄虺九首以
齧齧兮封狐捷而千里何此邦之炎瘴兮固蠻族之所
止徵禹跡之所不到兮檢職方而未序詔漢帝之喜功
兮肇開拓而疆理猗皇風之泰昌兮界昆吾以為宇包
五嶺以作藩兮括百粵以置吏朝越裳以重譯兮撫交
州而即叙眇余躬之陋微兮敷文教於茲隅戾泮宮以
振鐸兮選青衿之秀儒懼聖遠而言湮兮病曲學之支

離列四科以作人兮愧五教之未施憑丘墳以頤志兮
寄絃歌以自娛聞老聃之適戎兮講道德之玄虛蒙莊
遁於漆園兮馳放言以浴睢虞卿窮而亡聊兮猶發憤
以著書荀斯文之未喪兮竊希志於前規吾將寵今古
以騁驚兮掇罔象之玄珠亂曰去鄉遠遊心不樂兮自
冬徂春將焉薄兮災州旱濕風土惡兮魑魅晝出瘴癘
作兮狐死首丘不忘故兮代馬北風尚知慕兮世不我
知羌誰愬兮歸兮歸兮娛竹素兮

戎旅賦

明楊慎

恭承恩譴兮于役滇越捐珮江皋兮解紳雲闕三陟崔
崔兮九折軋軋不日不月兮遂屆窮髮撫孤旅而悁脰
兮拚衆困而慙心悵圭齋之駸邁兮逾四稔而迄今父
母孔達兮懿親離而北南類連達而分衢兮似同波而
殊潯慈烏忻於共巢兮恒鳥悲乎異林彼纖羽之微族
兮亦命侶而踟蹰何生人之含靈兮乃離羣而弗如詠
清人之介駟兮感放士之鳴鵠姬公畏於熠燿兮尼父

惜夫螭蛄屈托乘於螭豹兮莊寄徑於鼯鼯在聖哲而
固然兮攬古人而重歎哀吾生之罹郵兮背中土而播
荒粵戴盆而伏堪兮望淹兹之末光神悅恨而蜚颺兮
形轡卷而愴囊睇孫水之浩渺兮瞻靈關之峻極聆猩
猩之夜啼兮履拂拂之朝跡尋終古之攸居兮問祝融
之昔宅胥靡登而不懼兮魑魅過而奚慄堀堞揚兮
含沙影流喟茲徂春兮忽焉杪秋月令殊於九州兮瘴
卉華而歲周若有人兮好我攜旨酒兮思柔采檳榔兮

綴扶留贈相離兮結忘憂寒鷄雞兮為脯露江魚兮為脩
滇歌兮熱舞白日逝兮玄景浮獨持觴而懷遠兮雜
歎嘯其向隅遂還軫而休室兮隱零雨兮寂夜引簟枕
而假寐兮還夢歸乎親舍家人嘻以款語兮閭里紛其
來訝衆雞鳴而驚余兮晨光昉乎東射悵夢歡而覺悲
兮淚承睫而交下假靈氛以歷占兮援龜頌兮余謝曰
明庭其布德兮子行歸乎肆赦系曰莫靡荒服自中古
今日月之表燭不普兮章亥步窮禹罔覩兮蘭津開道

行商苦兮碧雞望祭使者阻兮余亦何為恒此土兮金
躍不祥順勿忤兮樂天知命去何憮兮

適吳賦

漢

梁鴻

逝舊邦兮遐征將遇集兮東南心愒怛兮傷悴志菲菲兮升
降欲乘策兮縱邁疾吾俗兮作讒競舉枉兮錯直咸先佞兮
嗷嗷固靡慙兮獨建冀異州兮尚賢聊逍遙兮遨嬉纘仲尼
兮周流儻云覩兮我悅遂舍車兮即浮過季札兮延陵求魯
連兮海隅雖不察兮光貌幸神靈兮與休惟季春兮華阜麥

含含兮方秀哀茂時兮逾邁愍芳香兮日臭悼吾心兮不獲
長委結兮焉究口囁囁兮余訕嗟恇恇兮誰留

秋夜七里灘聞漁歌賦

以明月白露光
陰往來為韻

唐王 綬

七里灘急三秋夜清泊桂棹於遙岸聞漁歌之數聲臨
風斷續隔水分明初擊楫以興詞人人駭耳既艤舟而
度曲處處含情衆籟微收濃煙乍歇屏開兩面之境壁
碎中流之月逃名浪跡始蕩槳以徐來咀徵含商俄扣

舳而迴發一水喧阗旁連釣臺羣鳥皆息孤猿罷哀激
浪不傳高唱而時時過去涼飈暗起清音而一一吹來
潺潺兮跳波激射歷歷兮新聲不隔初聞而彌覺神清
再聽而惟憂鬢白遠而察也調且異於吳歌近以觀之
人又非其郢客杳裊悠揚溪山夜長殊採菱於鏡水同
鼓枻於滄浪泛濫扁舟逸興無慚於范蠡沈浮芳餌高
情不減於嚴光況其岸簇千艘巖森萬樹湍奔如雪之
浪衣裊如珠之露寂凝思以側聆悄無言而相顧此時

遊子只添岐路之愁何處逸人頓起江湖之趣由是寥
亮清潯良宵漸深引鄉淚於天末動離魂於水陰究彼
轉喉似感無為之化察其鼓腹因知樂業之心既而暗
卷纖綸潛收密網灘頭而猶唱殘曲水際而尚聞餘響
漁人歌罷今天已明掛輕帆而俱往

秋風吹汝水賦

宋 范純仁

歲作噩之窮秋兮策羸驂而獨征嗟旅懷之羈憤兮感
時律之爭嶸遵汝流之縈紆兮背嵩峰之翠橫號霜風

之僚慄兮肅天地而淒清獵葭葦於晚岸兮雜紅翠之
搖旌脫林實於沙際兮浮瑣碎之秀瑩激回流之平迴
兮感綃文之細輕涵夕照之演漾兮蕩澄潭之空明促
東逝之滔滔兮方感繫於余行縻王事以去留兮跡未
安而遽更佩主人之眷勤兮服友生之意誠何會合之
難久兮特離憂之易并儻丘園之可服兮將就濯其塵
纓臻聖賢以相期兮惟道義之是營苟沒身以無愧兮
亦奚事於成名

桂林中秋賦

有序

宋 范成大

乾道癸巳中秋湘南樓月色佳甚病起不觴客又祈雨
蔬食清坐默數年來九遇此夕皆不常其處乙酉值三
館丙戌與嚴子文游松江有來歲復會之約丁亥又以
薄遽走陽羨與周子充過於菴畫溪上戊子守括蒼已
丑以經筵內宿庚寅使虜次於睢陽辛卯出西掖泊舟
吳興門外壬辰始歸石湖而今復踰嶺歎此生之役役
次其事而賦之

登湘南以獨夜兮挹訾洲之橫煙絳霄豔其光景兮湧
冰鏡於蒼巔悵旻宇之佳節兮并四者其良難矧吾生
之漂泊兮寄蓬廬於八埏九得秋而九徙兮靡一枝之
能安上瀛洲而瀑飲兮當作噩之初元旋水宿於垂虹
兮混金碧之浮天剋後期而竟爽兮忽罨畫之滄灣既
戊子而守括兮摘少微於樓欄丑寓直於玉堂兮聽宮
漏之清圓再西風而北征兮胡笳咽於夜闌迨返旆之
期月兮放茗雪之歸船幸故歲之還吳兮帶夕暉而濯

園甘土偶之遇雨兮就一丘而考槃今又飄飄而桂海
兮賓望舒於南躔訪農圃之昨夢兮杳征路之三千月
亦隨予而四方兮不擇地而嬋娟諒素娥之我咍兮老
塵浣於朱顏澄觀月之曩見兮炯不動而超然適病餘
而閉閣兮屏危柱與哀絃復訟風而閨雨兮謝鼎食之
芳鮮闋清齋而晤歎兮驚足迹之間闕誰職為此驅逐
兮豈不坐夫微官知明年之何處兮莞一笑而無眠


渡瀘賦

明
何景明

晨瞻崇丘鬱乎相表局以水峽隱以大洲沙莽寒日江
深夕流蓋將濟於瀘水傍人告予以理舟泐洪波以直
渡迎迴颺於上游顧中原而緬邈久西域以滯留感逆
旅之長勤懷古人而增憂想夫漢炎既燼蜀都始家區
土未闢士馬不加深入五溪橫制三巴冒險通塞柔通
來遐收羌髻以帶甲率庸廬而習戈捷吳權之堅銳摧
魏懿之精華今其斷岸遺津寂寥水涯苦霧縈石悲風
振沙音塵淪絕古今長嗟歎餘風兮莫覲幸故址兮重

過西望開創之基形勢蒼蒼襟夔府而控荆門峙巫峽
而流瞿塘簡書零落陣圖縱橫煙磧下月陰岸積霜風
雲慘而猶憤魚鳥畏而將翔功雖隕而譽遠身既沒而
國亡南瞻祠廟魏分敞宏松柏蔭戶丹青閼宮垣冒林
蔓階卷寒蓬亦徒嘻吁父老涕淚英雄而已嗚呼當其
長嘯之後三顧之餘氣感雲龍恩同水魚念李葉之否
運思中興之遠謨偉雄並乎三分恥偏安於一隅何遂
違其懿志竟弗騁其長驅吾哀斯人遭時不淑宜三代

以翱翔胡羣姦而馳逐矧功業兮難成且年歲兮易促
嗟哉天道高不可摩得志者寡失意恒多苟道之不行
雖孔孟其如何泛泛吾舟載揚其波艤彼清潯陟彼中
阿無人可邀聊獨行歌歌曰朔風起兮渡水寒扣櫂中
流兮懷昔賢遇非其時兮良獨艱嗟嗟遇非其時兮良
獨艱



御定歷代賦彙外集卷十